

## NA KIGINKHOLTA HIAM?

*"Na biakna uah Dan laibu sim gige ding thupipen in nei ngitnget un. Sun leh zan in suut unla, a sunga kigelh tapeuh zuih ding thupipen in nei un. Huci in na lamzang un, na lawhcing ding uh hi ." Joshua 1:8.*

Mosi sih khit a Joshua makaihna nuai a Israelte gamciam a lut dek lai un, Topa'n a tunga i gelh thupiak a na pia hi. Hih thu mah tu hun a Khristiante a dingin zong a poimawhpen ahihdan i Laisiangtho tungtawnin i mu thei hi. 2 Peter 3:18 ah **"Ahiah hangin, i Topa leh Honpa Jesu Khris hehpikhna leh theihna ah na khangto un..."** ci-in thupiak i hi uh hi. Tua bang a i Topa theihna lam a khantohna ding geelna in, Laisiangtho theihna lam a kitaitehna neih ding cih saptuam in tu kum sung a sep-le-bawl ding guante lakah khat in kikoih hi. Tua pen, Pasian' pha sakpihna lamen in, ahong tung ding July ni 9 a biakkhopna mun a neih dingin geel ahi hi. Hih hunah, naupangte hi in picingte hitaleh, Laisiangtho theihna lam a kitaitehna sai hi ding a; Picingte leh Senior pawlte kigawm ding uh a, kitaitehna dingin Joshua leh Thukhente (Judges) hi ding hi. Mark kikim omkhate khensat nadingin Thuhilhikkna (Deuteronomy) laibu sung pan dotna bawl hi ding hi. Naupangte- Beginner akipan Juniorte kitaitehna dingin Nipi ni Skul a sinlaite uh hi ding hi.

Laisiangtho thu tamsem theih ding bek hi loin, i sim leh i theihte khalam nuntakna ah zat ding i tup-le-ngiim hi zaw hi. Tua tawh kizui in, Joshua leh Thukhente laibute a paizia i theihsiam zawk nading ngiimna in hih Laisiangtho bu tegel a paizia tomkim in gen le'ng i ci hi.

**Joshua:** Joshua laibu ah Pasian in Israel mite tunga Kanaan gam piak ding a Abraham kiang a a kamciamna, ciamkholhsa bangin khat zong siit loin tangtung sak ahihdan kigelh hi. (Jos.23:14). Kanaan mite tung a gualzawhna in amaute siatna hanga Pasian in thu a khenna leh Israelte hotkhiak nadingin a sepna ahihdan hih laibu sungah kigen hi. Deut. 9:4). Hih laibu in a thupigen deuh thu sagih om hi: (1) Filistia gamah Israelte' gam thu a kigelh masakna hi. (2) Mosi nasep maban zomin Israelte Pasian' ciamsa gamah a makaih ding in Joshua akiteelna. (3) Pasian in ama mite adingin lim leh nalamdangte a bawlnate (Jerikho khua lakna (Jos.6), Gibeon a sun hun sausakna (Jos.10). (4) Thukun Lui hun a Pasian gupkhiatna tangthu sungah Pasian in a tuam vilvel-in "a siangtho galsimna" a zatna thute. (5) Pasian leh a mite kizopna thu thum in kigente – (a) thudik cihtakna (b) sianthona, leh (c) gupkhiatna cihte ahi hi. (6) Pasian in ama mite a gupkhiatna ding a sepna thute khang khat khit khang khat ah ciapteh tawntung ding a poimawhdan leh, (7) Akhan' khialhna leh a thamante (Jos.7).

Joshua makaihna nuai a Israelte'n gupkhiatna a ngah uh pen Thuciam Thak hun a Jesu'n tatkhiatna nna hong sep tawh tehkak theih hi. Hebru pau a "Joshua" cih pen Jesu cihna ahi hi. Joshua in Israel mite minthanna ah a tunpih mah bangin Jesu in mite minthanna ah a tum pih hi (He. 2:10, 14:1-13; 2 Kor. 2:14). Joshua in Pasian thukhenna namsau a tawipa ahih mah bangin, Jesu in zong nitawp ni ciangin Pasian umlo minam khempeuh tungah thukhenna namsau tawi in thu a khen ding hi.

**Thukhente (Judges):** Israelte' tangthu a Joshua sih khit hun leh Samuel' hun kikal thupiangte ciaptehna laibu ahi hi. Juda mite in ciamsa gam a luah khit uh ciangin Pasian tawh a thuciamnate uh mangngilh in milim biakna lam leh gitlohma ah hong kihei khak uh ciangin a thuak khak uh buainate kigelh hi. Hih laibu sungah a thupigen deuh thu guk om hi: (1) A buai den Israelte' tangthu ah Filitiate a zawh khit hun uh leh kumpi a neih cil uh kikal thute a gen hi. (2) Thudik thum hong lak hi (a) Pasian' mi i cih in Pasian pen ama' kumpi leh Topa ahih sak ding kisam hi (b) Mawhna in Pasian' mite siasak tawntung hi (c) Pasian mite kiniamkhiat-in thungenin, a mawhna uh pan a kiheikik uh ciangin Pasian in a leitang uh hoihsak ding hi. (3) Amaute in Pasian mitsuan loin, amau hoih sak bang ciat in gamta uh hi (17:6, 21:25). (4) Pasian in a mite a khialhna uh pan a kiheikik uh ciangin mawhna hang a thuak ding uh thukhenna panin honkhia hi. (5) Pasian' thu upna pan lampial a, galte' bawlsiatna thuakna, tua hang a lungkhamna, galte khutsung pan suahtakna, tawlgakna (*Sin, servitude, supplication, salvation, silence*) ahih kei leh, (*rebellion, retribution, repentance, restoration, rest*) cihte thute sagihvei mahmah kiviallet hi (3:5- 16:31). (6) Hih laibu in Pasian in ama mite' gitlohma uh gamdang mite zangin thukhen hi cih hong lak hi.

Thukhente laibu in a kip tawntung Psian' thukhunte hong lak hi. Pasian in mi khat ama nasem dingin a zat ding ciangin Khasiangtho tawh thuam ahidan zong hong lak hi. Jesu leh sawltakte nasep kipat cilna zong tua bang mah ahi hi.